

Basef Ifimba Jon Nanda'afi Fagali'i

Basef bandafi fagali'i Jon nanda'afi

- 1:1-4 Jon na'i basef Godi nasa'ma ukup asasipi ma sandagala
1:5-2:29 God anen nogogala'i. Ea' apa' mondafef mogogala'i ma monda' waf usi'ifi ukup pigapigaila epes hiasi hi'indalas
3:1-24 Apa' mape awasi Godi. Ea' dei' apa' ukup pindapindaila sahin owan ape'isi. Apa' epes awasi mini'ap Seteni sanda' waf awafi atapis.
4:1-6 Apa' mowaloga ambagof hiagufi hi'indalagofa mogogawa agwafomba Godi a'a Satani.
4:7-5:21 God nasapa' nogamana ananiai nafli' itap apa'e nihimba'mapa waf ukup pagapagailasafi. Ea' mohapifana ma mogape sisihpama anen atona mogofa' ambal namili.

Basef ambal namili lagapaifi

1 ¹Afa' wanda' basef ifimba ma anona aman agilinama Basef, anen nagaso'apa ambal namili lagapaipai. Aman anamba fowa' gani dambadamba nagapani. Afa' wame' basef ananifi ea', watolona naep afa'ipi wahapilana lagof afa'igufi. ^a ²Ambal alamba namili lataga ea' afa' watolol naep afa'ipi. Isimba atis dei' afa' wawalipipa ma ambal alamba lagape dondol lifilafii. Ambal alamba fowa' lape laloma Ahamapa ea' dei' lataga alihigima watolol. ³Hiahaom amamba afa' watolom wagame'ami dei' wa'lipipam ipa' wapani ma pegape nembel atotombel pegalomafa. Afa' wape wambota atota waloma Ahamapa nagaloma Nogamana ananinai Jisas Krai. ^b ⁴Afa' wanda' basef ifimba ma atiasi dagala ape'ini negataga lu'win si'ina apa'. ^c

a 1:1 Jo 1:1-2,4,14; 1 Jo 2:13-14 **b** 1:3 Jo 16:24 **c** 1:4 1 Ti 6:16; Je 1:17

God anen nogogala' nanda' waf bu'wafi usi'ifi atifi

⁵Basef ifimba afa' wame'anamef na'amba. God anen nogogala' afitinai. Ina anota akot tailana kwasakwasala, owa'atin endilisi.^d ⁶I'i apa' mi'i mape nembel atotombel malomana, ama apa' ata' mape manda' waf awafi si'i magape akot atotai, apa' mambaso'ma apa' atepa ma basef ape'ifi faloma fe' ape'ini.^e ⁷Anen nogogala' afitinai. I'i mope mogala' si'i anen waf awafi akapa, ea' mope nembel atembel moloma sahin owan hiasi. Ea' esimbel Jisasi Nogamana Godi basa'opa waf awafi ape'ifi hiafi hi'alaf, ea' mataga be'epa.^f ⁸I'i apa' mi'i waf awafi akapa, apa' mambaso'ma apa' atepa ea' basef endilisifi ina fapaepa, owa'atin. ⁹I'i apa' mowalapa waf awafi ape'ifi alihif, atiasi anen nokwahomapa waf hiafi awafi ape'ifi okom maso'anafa nosa'opapa mogataga be'epa hilili'. Basef fowa' nagala' lapafi ea' nilif nonda' waf usi'ifi datima. ¹⁰I'i apa' mi'i, “Apa' owa' monda' waf awafia”, apa' mofala God ma'i anen aman naga'i basef baso'afii. Ea' basef ananifi ina fape opalef ape'ilifi, owa'atin.

Krais aman nagatopalopapai

2 ¹Ipa' alipipai ae'ipai, ae' okom maimailipa, anda' basef ifimba fafe'mago ipa' ma ina penda' waf awafi, owa'i. Apa' i'i anin epen nenda' waf awafi, anin anona nogatopalopani nape. Anen Jisas Krais bo'ona hilili'i. Anen nohali' Ahamana ma nogakwahoman waf awafi epen inimba okom moso'anaf.^g ²Anen atona nahagofa okom numbutinai Godi naga' nakwaha waf awafi ape'ifi. Apa' ina nakwaha waf awafi ape'ifi atef, owa'. Anen nakwaha waf awafi ma epes hiasi itapasi okom maso'anaf. ³I'i apa' mila basef Godi banagafi, apa' mogawana endilisi.^h ⁴Epen ami ni'i, “Ae' egawa God andeande’”, ama anin owa' nila basef Godia, anin nagambaso'ami. Ea' basef endilisifi ina fape opaf ananifi, owa'. ⁵Apa' epen ami nila basef ananifi, anin okom pelele' si'im maila God endilisi. Apa' magawa apa' mape sisihipama God na'amba. ⁶Epen ami ni'i, “Ae' ape sisihiwi ma God”, fe' ananini nendataga usi'in si'i fe' Jisas Kraisi.^j

Epen ami okom mogamogaila sahin owan ananisii, inimba nape mogogala'i

⁷Alipipai ae'ipai, ae' okom maimailipa. Dei' ae' anda' basef ifimba fafe'mago ipa', ina anin mu'uli dambaini, owa'atin. Ae' al'ipipa mu'uli inimba atin fowa'ini, fowa' dambadamba pegegawani. Mu'uli inimba basef ipa' pagame' ea'i.^k ⁸Apa' basef banagafi ma mu'uli inimba dei'

d 1:5 1 Jo 2:4 **e** 1:6 Jo 3:21; Ais 2:5; Hi 9:14; Re 1:5, 7:14 **f** 1:7 Sam 32:5; Pro 28:13
g 2:1 Jo 1:29, 11:52; Kl 1:20; 1 Jo 4:10,14; Hi 7:25, 9:24 **h** 2:3 1 Jo 1:6,8 **i** 2:4 Jo 13:15;
 Jo 14:21,23; 1 Jo 4:12,17; 1 Jo 5:3 **j** 2:6 2 Jo 5-6; 1 Jo 2:24, 3:11 **k** 2:7 Jo 13:34; Ro
 13:12; Jo 1:9

anda'ef fagafe'mago ipe'li, ifimba dambaifi. Ea' fataga alihifa Kraisi nagil'mif dei' ipa' wapani pagi'mif. Dei' main, akot dei' ta'i pele'etata ea' mogogala'i endilisimi mataga mape ea'.^l

⁹Epen ami ni'i, "Ae' ape mogogala'i," ama anin opaf aofa sahin owan ananisi, epen inimba ata' nape akot atapin.^m ¹⁰Epen ami okom magamagaila esis sahin owani, anin nagape mogogala'ii. Ea' epen inimba ina ata' anef waf awafi fapain fanda'an newa, owa'atin.ⁿ ¹¹Apa' epen ami opaf awasifa sahin owan ananisi ni'i bousi, epen inimba ata' nape akot ea' nafe' akot atona nasopama naep ananipi. Ea' ina nati ufa'w negawa'w, owa'atin.^o ¹²Ipa' awasi ae'ipai, God nakwaha waf awafi ipe'ifi hi'alafa agol Kraisi okom maso'anaf. Isimba atis dei' anda' basef ifimba fafe'mago ipa'.^p ¹³Ipa' ahape, apegawa aman anamba andeande' fowa' dambadamba nape atapina. Ea' dei' anda' basef ifimba fafe'mago ipa'. Ipa' amam sa'upai, ipa' patofa wandafa aman aunai pikila'ana. Isimba atis dei' anda' basef ifimba fafe'mago ipa'. ¹⁴Ipa' awasi, apegawa Ahamapa andeande'. Ea' dei' anda' basef ifimba fafe'mepago. Ipa' ahape apegawa aman anamba fowa' dambadamba nape nafi'i nafi'i atapina nape. Isimba atis dei' anda' basef ifimba fafe'mepago. Ea' ipa' amam sa'upai, ipa' banagipai ma penda' waf bu'wafi. Ea' basef Godi fagape nomon opalef ipe'ilifi dei' patofa wandafa aman aunai pikila'ana. Ea' dei' anda'ago basef ifimba ma ipa'.^q

Apa' ina a' ukup pipila waf itapafi, hapaiifi

¹⁵Ipa' ina a' ukup pipila waf itapafi o anis hiahawes awasisi sagape itapi, owa'i. I'i ipa' ukup pigapigaila waf itapafi, ipa' ina ukup paipaila Ahamapa, owa'atin.^r ¹⁶Apa' mogawa epes saloma hiahaom hiami magape itapi amamba na'amba. Hiahaom amamba opalef apimi mogohafemami maloma epes saloma hiahaom amamba epes satolom nelelemb kowagalamami maloma hiahaom amamba esis gagatomami ma anis satilis sagasa'ma agof lu'wagofasami, hiahaom amamba ina mafi'i Ahamapa, owa'atin. Amamba mataga itap apa'e.^s ¹⁷Waf itapafi feloma hiahaom hiami epes ukup pigahafemami owagama a' higililam, apa' epen mamahina nigaila basefa okom Godi, epen inimba a' nepe lililafi dondol.^t

Bounai Kraisi nataga ea'

¹⁸Ipa' alipipai ae'ipai ae' okom magamagailipai, dei' nemaf fa'i a' hi'ililaf. Fowa' ipa' pame' basefa bounai Kraisi na'i nogataga. Apa' dei' bousi ananisi hiasi asataga ea'. Ea' apa' mogawa dei' nogota ta'i ahi'ilata.^u

l 2:8 1 Jo 3:10,15; 1 Jo 4:20 **m** 2:9 Jo 11:9; Ro 14:13 **n** 2:10 Jo 11:10, 12:35 **o** 2:11 1 Ko 6:11 **p** 2:12 1 Jo 1:1 **q** 2:14 Ro 8:7 **r** 2:15 Ro 13:14; Je 4:16; 1 Pi 2:11 **s** 2:16 Mt 7:21; 1 Ko 7:31 **t** 2:17 1 Pi 4:7; Mt 24:5,24; 2 Jo 7 **u** 2:18 Ap 20:30; 1 Ko 11:19

¹⁹Epes isimba sakwaha apa' ea'. Fowa' epes isimba ina a' ape'isi si'isi, owa'. I'i ape'isi si'isiai, esis asope solomapa atapis. Apa' owa', owa'atin. Esis asakwahepa ea'. Isimba atis dei' apa' mogawas andeande', epes isimba hiasi owa' mini'ap ape'ipia.^y

²⁰Apa' ipa', Krai nase'epa Ambal bu'unai Godi ea'. Dei' ipa' hipai pegawa basef endilisifi ea'. ²¹Ipa' ina pelelama basef ifimba endilisifi ma dei' enda'mepago basef ifimbai, owa'. Ipa' apegawef. Ea' pegawa basef baso'afi ina fawalapa basef ifimba endilisifi, owa'atin. Isimba atis dei' anda'ago basef ifimba ma ipa'.^w ²²Aman nagambaso'masi anen ami? Anen aman anamba nambaso'mas naga'i Jisas ina Krai, God nasapa'ana nagafi'ii, owa'. Aman anamba bounai Kraisi. Anen nowa' alafugama Ahamapa naloma Nogamana wapani.^x ²³Epen ami negewa' alafuga ma Nogamanai, anen newa' alafugama Ahamana wapani. Ea' epen mamahina nagaso' opafa Nogamanai, Ahamapa nape nomona okom ananiami.

Ambal bu'unai Godi nawalipapa ma basef endilisifi

²⁴Basef ifimba fowa' dambadamba ipa' pagame'afi, ifimba hapilaef ukup ipe'ipi sisihi. I'i ipa' pihapila basef ifimba pali' pagame'afi ukup ipe'ipi sisihi, bola pepe sisihipama Nogamana noloma Ahamana mope atapim molomepa.^y ²⁵Krai ana'ipapa basef endilisifi banagafi, anen atiasi noso'apa ambal namili mope andeande' lifilafi. ²⁶Ae' anda' basef ifimba fafe'mago ipa' awalapa wafa epes isimbai sa'i sogambaso'mipai.^z ²⁷Apa' ipa', Krai nase'epa Spirit Ambal ananinai. Ea' Ambal ananinai nape nalomepa ukup ipe'imi nomon. Isimba atis dei' ipa' ina gawa akepa ma anin epen negawalipapa, owa'atin. Spirit Ambal Kraisi nawalipapa ma hiahawes hiasi ina nambaso'mapa, owa'. Dei' ipa' hapifa Krai pepe sisihipama anen.^a ²⁸Aho', ipa' awasi ae'ipai, ae' okom maimailipa a'i pendape sisihipama anen ama anaf notaga nondawalap, apa' ina ambagof awagof, owa'. Apa' mulutu banagepa ma naep ananipi.^b ²⁹Ipa' pegawa Krai anen bu'unai hilili' endilisi. Ea' pegawa anif basef wapani, epes mamahisa sagaila waf bu'wafi hilili'i, esis awasi Godi.

Dei' apa' mape awasi Godi

3 ¹Awasi! Ahamapa God okom maimailapa a'owa'. Ea' anen nofalapa awasi ananipai. Endilisi atis, apa' awasi ananipai atepa. Isimba sandaiwa'ma Godi sagape itap apa'i, esis ina sogawa God, owa'atin. Isimba atis dei' esis ina sogawa apa' wapani.^c ²Ipa' alipipai, ae' okom

^v 2:19 1 Ko 2:15; 1 Jo 2:27 ^w 2:21 1 Jo 4:3; 2 Jo 7 ^x 2:22 Jo 5:23, 15:23; 1 Jo 4:15, 5:1; 2 Jo 9 ^y 2:24 Jo 3:15, 6:40 ^z 2:26 Jo 16:13 ^a 2:27 1 Jo 3:2, 4:17 ^b 2:28 1 Jo 3:7,10 ^c 3:1 2 Ko 3:18; Fl 3:21; Jo 1:12-13; Jo 16:3

maimailipa. Dei' apa' mape awasi Godi. Apa' anaf mope mi'imama, isimba atis apa' ina dei' mogawas, ata' owa'. Apa' owa', owa'atin. Apa' a' mogawa, anafa Kraiis nogataga alihina, nemaf afamba, dao' a' motolona endilisi ea' motaga mope si'i anen nagape. ³Epes mamahisa sape sagahafa anen nogafi'ii esis sape sandondomba opalef asasilifi lifilafi ma sogape bo'wes hilili' si'i Kraiis nagape. ⁴Epen ami nanda' waf awafii, anin negesambala mu'uli Godi. Dei' main, waf awafi atef afamba esis satopa' mu'uli inimba.^d ⁵Ipa' pegawa Kraiis nataga ma nogakwaha waf awafi ape'ifi hi'igalaf. Anen ina nanda' anef waf awafi, owa'atin.^e ⁶Ea epen ami nape sisihin nagaloma anini, inimba ina ata' nape naila waf awafi, owa'. I'i epen mamahina nigaila waf awafii, okom ananiami ina a' nati Kraiis negawana, owa'atin.^f

⁷Ipa' alipipai ae'ipai, solawaipa andeande'!. Na'amba anin epen a' nembaso'mepa. Epen ami nenda' waf usi'ifii, anin nape hilili' si'i Kraiis nagape.^g ⁸Satan nanda' waf awafi fowa' dambadamba nafi'i nafi'i dei' ata' nape atapina. Ea' i'i epen mamahina nenda' waf awafi atapin negapomafi, anin epen Satani. Nogamana Godi nafi'i nataga nandawalapa main? Ma nogahambombaga maol Satani.^h ⁹Epen ami nagape awani Godi, anin ina nape nanda' waf awafi atapin, owa'atin. Dei' main, okom Godi a' nape opaf ananifi ea' anin a' awani Godi. Ea' anin ina la'ifina ata' nenda' waf awafi atapin, owa'atin. ¹⁰I'i apa' mi'i mogawa epen mamahina, nogamana Satani a mamahina Godi, apa' mogogawas na'amba. Epen ami owa' nenda' waf usi'ifia ma owa' okom mogamogaila alipisi ananisia, anin ina epen Godi, owa'atin.ⁱ

Wafa nomonas sindaima atin endilisi ma sahin owan

¹¹Basef fowa' dambadamba ipa' pagame'afi ifimba. Apa' a' ukup pindaila esis sahin owan endilisi.^j ¹²Apa' ina a' mila waf Kaini, hapaifi. Kain wambota aman aunai Satani ea' naha owamana Abel naga'. Dei' maina nahana nagaga'? Anen kowalana ma maol bu'wani owamana nanda'ani dei' nahana naga'. Apa' maol ananini awasini atin.^k ¹³Ipa' sahin owan ae'ipai, i'i esis sagape itapi sogowa' alafugaha Godi sindaiwa'mepa, ipa' ina a' gogolagalasipa, owa'i.^l ¹⁴Apa' ukup pagapagaila esis sahin owani, isimba apa' mogawas dei' a' makwahef ea' waf afamba ga'ifi ea' mataga mofa' ambal namili. Dei' main? Apa' ukup paipaila esis sahin owan endilisi. Epen ami owa' okom mogamogaila anin sahin owania, anin ata' nape atapina waf ga'ifi.^m ¹⁵Epen ami okom numbutima sahin owan ananisi, anin si'i naha anis amam nematawa

d 3:4 2 Ko 5:21; 1 Pi 2:22-24; 1 Jo 2:2 **e** 3:5 Ro 6:1-2,14; 1 Jo 3:9 **f** 3:6 1 Jo 2:29
g 3:7 Jo 8:44 **h** 3:8 1 Jo 5:18 **i** 3:10 Jo 13:34 **j** 3:11 Jen 4:8 **k** 3:12 Mt 5:11-12; Jo 5:18-19 **l** 3:13 Jo 5:24; 1 Jo 2:11; Mt 5:21-22 **m** 3:14 Re 21:8

sagaga'i. Ea' ipa' pegawa epen naha anis sagaga'i, anin ina dei' a' nefa' ambal namili lapaina negape andeande' lifilafi, ata' owa'atin.ⁿ ¹⁶Waf afamba apa' ukup pigapigaila anis daiasafi mogogawaf na'amba. Krai nakwaha ambal ananili ma nagatopalopapa. Isimba atis apa' wapani a' mondokwaha ambagof ape'imi ma mogatopalopa sahin owan ape'isi.^o ¹⁷I'i anin epen hiahaom hiamini ma nigati sahin owan hiahaom akani ma anin owa' okom mimila sahin owana, epen inimba ina okom maimaila God, owa'atin. Dei' maina epen inimba naga'i, "Okom ae'ami magamagaila God"? Owa'atin, anin nambaso'am.^p ¹⁸O, alipipai ae'ipai, apa' ina a' ukup paipaila esis alipisi ma muga'ipasa basefa malogof atogof wafigufi, owa'atin. Apa' ukup pindapindaila esis endilisi a' motopalopas monda' waf bu'wafi endilisifi mihimba'masaf.

**Epen nagahapifana endilisii, anin ina ombal mahana
naep Godi, owa'. Anin banagen nape.**

¹⁹I'i apa' monda' waf afambai ma ukup pipila sahin owan ape'isi, apa' mogawa maila basef endilisifi. Waf afamba fanda' opalef ape'ilifi awanelefa mogape banagepa ma naep Godi. ²⁰I'i malogof fagape opalef nomoni fi'ipapa fi'i apa' manda' waf awafii, God dembinai a' nikila' ukup ape'ipi ea' nagawa hiahaom hiami.^q

²¹Alipipai ae'ipai, ae' okom maimailipa. I'i malogof fagape opalef nomoni owa' fowalapa anef waf awafi fi'ipapaia, dao' mefe'ma God opalef ape'ilifi awanelef mope banagepa.^r ²²I'i apa' mi'i mondabeten mogahali'ana ma anis hiahawes, anen nogaso'apasi. Dei' main, apa' maila okom ananiami ea' manda' hiahawes anen sonahana ma apa' monda'asi.^s ²³Basef banagafi Godi fa'i na'amba fa'i apa' mondahapifa agol nogamanai Jisas Krai ea' ukup ape'ipi pindapindaima atin si'i anen naga'ipapa dindinip.^t ²⁴Epen mamahina nigaila basef Godi banagafi, anin nepe sisihin neloma God ea' God nope sisihina noloman. Anen a' naso'apa Spirit Ambal bu'unai ananinai ea' dei' mogawa God nape sisihina nalomapa.

Basef biafifa Ambal bu'unai Godi naloma ambal aunai lagambaso'ami

4 ¹Alipipai ae'ipai, amom profet magambaso'ami mafe'agon anamba itap hiagoma. Ipa' ina pihapifa epes isimba hiasi saga'i, "Ae' Ambal bu'wali Godi nagapauwai." Owa'. Ipa' ata' pegwamba ambagof amamba hiami pendendomam ama pegegawa amom mataga mafili Spirit Ambal Godi a'a owa'.^u ²Ipa' pegegawa Ambal Godi na'amba. Epen mamahina

n 3:15 Jo 13:1; Ga 1:4; 1 Te 2:8 **o** 3:16 Diu 15:7 **p** 3:17 Je 2:15-16 **q** 3:20 Hi 4:16
r 3:21 Mt 21:22 **s** 3:22 Jo 6:29, 13:34 **t** 3:23 Ro 8:9; 1 Jo 4:13 **u** 4:1 1 Ko 12:3; Mt 7:15; 1 Jo 2:18; 2 Jo 7; 1 Te 5:21

ni'i, "Endilisi, Jisas Kraisi nafi'i nataga epen endilisinai", epen inimba Ambal Godi napain opaf ananifi.^v ³Apa' epen ami owa' niga'lias na'ambai ma Kraisia, Ambal Godi ina nape anin, owa'atin. Ambal nagape epen inimbai anen bounai Kraisi. Fowa' pagame' basefa Spirit ambal bounai Kraisi nogafi'i, dei' a' nafi'i nape ea' itap apa'e.^w

⁴Ipa' alipipai ae'ipai, ipa' epes Godi ea' panda' wandaf paloma amom profet awami magambaso'ami pikila'am. Dei' main, Ambal Godi nagape nomon opalef ipe'ilif anen banagonai nikila' aman aunai nagape itap apa'ii.^x ⁵Epes isimba sagaila waf itapafii saga'i basef itapafi atifii, epes itapasi sahapifas. Dei' main, esis isimba itapasi atis.^y ⁶Apa' apa', epes Godi. Epen mamahina negegawa Godi, anin neme' basef ape'ifi. Apa' epen ami owa' epen Godia, inimba ina name' basef ape'ifi, owa'atin. Ea' isimba atis dei' ametal inimba nihimba'mapa ma mogogawa epes isimba. I'i Ambal Godi endilisinai nupais, aseme' basef ape'ifi. Apa' i'i ambal nagambaso'ami nupais, ina seme' apa', owa'.^z

God okom maimailapa a'owa'

⁷Ipa' ae' okom magamagailipai, apa' atepa a' ukup pindaima atin. Dei' main, waf afambai fafi'i God. Epen ami okom magamagaila sahin owani, anin awani Godi ea' dei' negawa God a' naila basef ananifi.^a ⁸Epen ami owa' okom mogamogaila sahin owania, anin ina negawa God, owa'. Dei' main, God okom magamagaila epes hiasii.^b ⁹God a' nihimba'mapa anen okom maimailapa na'amba. Anen nasapa' Nogamana ananinai atotona nafi'i itap apa'e ma apa' mogofa' ambal namili ma anen.^c ¹⁰Basef kofagefa ma God okom magamagaila ape'i ifimba. Apa' ina mali' ukup paipailana, owa'atin. Anen nali' okom maimailapa ea' nasapa' Nogamana ananinai nafi'i ma nanda' okom numbutimi Godi maga' nakwaha waf awafi ape'ifi okom magaso'anaf.^d ¹¹Ipa' alipipai, waf afamba atef fihimba'mapa God okom maimailapa a'owa'. Ea' apa' wapani ukup pindaima atin endilisi.^e ¹²Ina anin epen nati God, owa'atin. I'i apa' atepa ukup pindaima atin, God nope sisihina ma apa' ea' okom ananinai magamagaila ape'i atiasi mope molomapa opalef ape'ilifi nomona monda'as na'amba atin ukup pindaima.^f ¹³Dei' apa' mogawa ea' mape sisihipa maloma God ea' nape nalomapa. Dei' main? Anen naso'apa Ambal ananinai nape nalomapa.^g ¹⁴Ea' apa' mogawa Ahamapa nasapa' Nogamana ananinai ma nowambilai epes hiasi sagape itapi nokwahomas waf awafi sogotanimai ma anen. Apa' mati hiahawes isimba ma anen nowambilai epes sogotanimai ma'ipapas.^h

v 4:2 1 Jo 2:18; 2 Jo 7 w 4:3 Mt 12:29; 1 Jo 5:4-5 x 4:4 Jo 15:19 y 4:5 Jo 8:47
z 4:6 1 Jo 2:29 a 4:7 1 Jo 4:16 b 4:8 Jo 3:16 c 4:9 Ro 5:8-10; 1 Jo 2:2 d 4:10 Mt 18:33 e 4:11 Jo 1:18; 1 Jo 2:5-6 f 4:12 2 Ko 1:22; 1 Jo 3:24 g 4:13 Jo 3:17 h 4:14 1 Jo 5:5

¹⁵Epen ami negawalapa basef alihigima niga'i, "Endilisi, Jisas anen Nogamana Godi", God a' nope sisihina noloman, anin wapani nape sisihina anen.ⁱ ¹⁶Isimba atis dei' apa' mogawa mahapifa God anen okom maimailapa a'owa'.

God anen kofagonama okom magamagaila epes hiasii. Epen ami nape okom maimaila God naloma epes hiasi atapin, anin nape sisihin naloma God ea' anen nape sisihina naloman.^j ¹⁷Waf ukup pigapigaila esis Kristen alipisi a'owa', afambai fataga be'ef endilisi ma apa' ina a' mondafa'ma nemaf afamba lu'wafi ma God nogowalogapa, owa'atin. Dei' main, anen napaipa nomon, ea' mape itap apa'e si'i Krai nagape. Apa' ina ombal mahapa ma nemaf afamba, owa'atin. ¹⁸God okom maimailapa, apa' wapani ukup paipailana. Ea' ina ombal mahapa, owa'atin. I'i waf afambai fetaga be'ef endilisi ma apa', afamba ea' fatofa waf ombal magahapamafi fewala hi'alaf. Dei' main, kofagema ombal magahas, ombal mahasa hiahaom akafimi anaf God nowalogasa waf awafi nogaso'asami. Epen mamahina ombal mogahani, waf okom mogomogaila God ina fataga be'ef endilisi ma anin, ata' owa'atin.

¹⁹God nali' okom maimailapa a'owa'. Isimba atis dei' apa' ukup paipaila anen naloma epes hiasi wapani. ²⁰I'i anis epes si'i, "Apa' ukup paipaila God," ama i'i esis ukup wandafuma Kristen alipisi, epes isimba sagambaso'ami. Dei' main? Ina anin epen atitin a' nati God, owa'. Epen ami nati alipini ananini ma owa' okom mogomogailania, epen inimba ina la'ifina okom mogaila God owa' nogatolona naepia, owa'atin.^k ²¹Basef ifimba Krai naga'ipapaef dindinipi ifimba. Epen ami okom magamagaila Godi, epen inimba okom mondaila sahin owan ananisi wapani.

Epes sagahapifanai satalogofa waf itapafi

5 ¹Epen mamahina nagahapifa Jisas anen Krai God nasapa'ana nagafi'ii, epen inimba awani Godi. Ea' epes mamahisa ukup pagapagaila ahamas atotonai, esis ukup paipaila awasi ananisi wapani.^l ²I'i apa' ukup pipila God mila basef banagafi ananifi, atiasi waf afambai apa' mogawa ukup paipaila awasi ananisi wapani.^m ³Waf kofagefa ma apa' ukup pigapigaila Godafi afamba. Apa' mondaila basef lo banagafi ananifi, ina ahifif a'owa', owa'atin.ⁿ ⁴Dei' main, awasi mamahisa Godi isimba la'ifis sagatalogofa waf itapafii. Apa' mahapifa God dei' waf afambai apa' mikila' wandaf matalogofa waf itapafi awafi.^o ⁵Epen ami nikila' wandafa waf awafi ea' natalogofa waf itapafi? Epen nagahapifa Jisas naga'i anen Nogamana Godii, anin atin nikila'af.^p

i 4:15 1 Jo 4:8 **j** 4:16 1 Jo 2:28 **k** 4:20 Mt 5:44-45; Mk 12:29-31 **l** 5:1 1 Jo 4:15
m 5:2 Jo 14:15,23-24; 2 Jo 6; Mt 11:30 **n** 5:3 Jo 16:33 **o** 5:4 Ro 8:37; 1 Jo 4:4 **p** 5:5 Jo 1:29-34

God nawalapa basef alihifa Nogamana Ananinai

⁶Jisas Krai ma'una aman anamba a' nafi'i. Ea' anen nofa' baptaisambel, ama main sahana naga' esimbela ananimbela balo. Anen ina nafi'i ma waf embela atef, owa'. Anen nafi'i ma waf embela esimbela endilisifi. Ambal bu'unai Godi kofagonama waf endilisifi hi'alaf. Ea' Ambal anamba nawalipasa basef ifimba ma Krai endilisifi.^q ⁷⁻⁸Spirit Ambal Godi naloma embela esimbela isimba wanifis sawalapa basef kofagefa atifif.^r ⁹Apa' mahapifa basef epesa sagawalipasafi. Apa' basef Godi nagawalipasafi banagef fikila' basef epesi. Dei' main, basef ifimba fa'i Nogamana ananinai.^s ¹⁰Ea' epen ami nagahapifa Nogamana Godi, basef ifimba endilisifi fape nomon okom ananinai. Apa' epen ami owa' nigahapifa Godia, epen inimba na'i Godi aman nagambaso'ami. Dei' main, epen inimba ina nahapifa basef ifimba Godi naga'ifa Nogamana ananinai, owa'. ¹¹Ea' basef ifimba endilisifi na'amba. Godi a' naso'apa ambal namili ma mogape andeandela lifilafi dondol. Ambal namili alamba anen naso'apala Nogamana ananinai atona.^t ¹²Epen ami negape sisihina negaloma Nogamanai, inimba dei' nefa' ambal namili. Apa' ami owa' nepe sisihina Nogamana Godia, inimba ina nefa' ambal namili ma negape andeandela lifilafi, owa'atin.^u

Apa' mogawa ea' apa' mofa' ambal namili

¹³Ae' anda' basef fafe'mago ipa' pagahapifa agola Nogamana Godi. Anda'efa ipa' pegegawa dei' apefa' ambal namili pape andeandela.^v ¹⁴Apa' mogawa, i'i apa' mila okom Godi atom mondabetena hiahawes mamahisa hiasi, anen atiasi nogame' beten ape'inii. Ea' nemaf mamahefa mefe' felefele'ma anen mondabeten, ina ombal mohapa ma anen, owa'. Ukup ape'ipi pepe banagepa. ¹⁵Apa' mogawa anen nagame' betena hiahawes mamahisa dei' magahali'anamasi. Ea' mogawa dei' a' mape si'i mogofa' hiahawes isimba ea'i.^w

¹⁶⁻¹⁷Waf hiafi hi'alaf owa' usi'ifia afamba waf awafi. Epesa sanda' waf awafii sawala basef Godi banagafi. Apa' waf hiafi awafi ina fenda' epesa sogaga' lamonasi, owa'. I'i anin epen niti anin sahin owan ananinai nenda' anef waf awafi owa' fenda' epen inimba nega' higililana, epen inimba nanda' waf afambai a' nendanda' betena Goda, nogaso'an ambal namili. Endilisi, anef waf atef awafi fanda' epesa sogaga' lamonasi. Ae' ina a'lipa ma pendabetena epesa sanda' waf afambai, owa'.^x

¹⁸Apa' mogawa epesa mamahisa sagape awasi Godi, esis ina sape sanda' waf awafi atapis, owa'atin. Dei' main, nogamana Godi numafias

q 5:6 Jo 15:26 **r** 5:7-8 Jo 5:32-37; Jo 8:18 **s** 5:9 Ga 4:6 **t** 5:11 Jo 3:36 **u** 5:12 Jo 20:31 **v** 5:13 Jo 14:13, 16:23; 1 Jo 3:21-22 **w** 5:15 Mt 12:31 **x** 5:16-17 1 Jo 3:9; Jo 17:5

andeande'ma banagami ananimiti ma aman aunai ina nohambombagas, owa'atin.^y ¹⁹Apa' mogawa apa' awasi Godi, apa' isimba owa' awasi Godia sape lafela aman aunai Satan dembinai asasinai.^z

²⁰Apa' mogawa Nogamana Godi nafi'i ma noso'apa gawa ma mogogawa anen God endilisinai. Apa' mape sisihipa ma anen endilisinai naloma Nogamana ananinai Jisas Krai. God anamba endilisinai anen kofagonama ambal namili mogape andeande' lifilafii.^a

²¹Awasi ae'ipai, ipa' pewa' alafugaha god baso'amunai ea' pendape banagepa.